

Bodi bilong yu Laik bilong yu

Seksol asalt em i brukim lo.

Nogat wanpela man i gat rait long fosim yu o poretim yu long mekim pasin we yu ino pilim orait long skin bilong yu long mekim.

Sapos yu or wanpela husait yu save long en i kisim bagarap long seksol vailans yu ken kisim halivim long ol dispela rot:

Queensland Polis: Ringim 000 (tripela zero)

Nesanel Sevis bilong Seksol Asalt:

Ringim 1800 737 732

(fri kol long olgeta dei na nait)

Fri sevis bilong tanim tok:

Ringim namba 131450 na wanpela bai halivim long tanim tok bilong yu i go long Inglis



1

**Save
long raits
bilong yu**

2

**Toktok long
wanpela husait
yu trastim**

3

**Kisim
sapot**

1

Save long raits bilong yu

Yu gat rait long wokim sois long husait bai i ken kamap klostu pren bilong yu.

Klostu pren i ken kamapim pasin bilong holim pas, lukluk long seksol piksa, salim seksol toktok long fon, o putim han long ol hap bilong sem na ol kain pasin bilong sigirapim bel wantaim koap.

Fosim yu long mekim olgeta dispela samting em i pasin nogut tru o em i raskol pasin.

Hia long Australia, wanpela man ino inap holim skin bilong yu, pretim yu, o senisim ol piksa nogut bilong yu o wantaim yu we yu ino laikim. Em bai no inap mekim ol toktok long skin bilong yu, long pasin bilong koap, long yu o long ol arapela lain sapos yu no givim tok orait.

Seksol vailans em i bikpela rong na ol lain husait i wokim i ken go long kalabus inap long (14) fotinpela krismas.

Sapos yu ripotim wanpela asua, o yu yet yu wanpela viktim bilong dispela hevi, bai no inap bagarapim visa o wok bilong yu.

Wanem samting em i seksol asalt?

Seksol asalt em i karamapim ol pasin seksol bilong brukim lo, olsem:

- **REP** we wanpela i fosim yu long koap (kan, as o maus)
- **HOLIM SKIN BILONG YU TAIM YU NO TOK ORAIT**, aninit long kolos
- **RAUSIM GUMI** pastaim o namel long koap, we yu ino bin givim tok orait
- **PASIN BILONG FOS** em i taim wanpela i giamanim yu o fosim yu long wokim sampela pasin seksol we yu ino laikim
- **PASIN BILONG BIHAINIM YU** em i taim wanpela i save hait na bihainim yu long wokabout o hait na lukluk stil
- **LUKLUK STIL LONG YU TAIM YU NO TOK ORAIT**, taim yu koap wantaim narapela i stap o taim yu as nating we yu ino bin givim tok orait bilong yu
- **PASIN BILONG SOIM OL HAP BILONG SEM LONG OLGETA** taim wanpela i soim ol hap bilong sem bilong ol long yu
- **PASIN BILONG FOSIM YU LONG LUKIM O MEKIM OL PIKSA O VIDIO SEKSOL** em i taim wanpela fosim yu long tek pat long mekim o lukim wanpela koap video o piksa
- **PASIN BILONG SALIM OL SEKSOL PIKSA LONG FON** taim wanpela i salim as nating piksa bilong yu, we yu ino bin givim tok orait, o taim wanpela i salim as nating piksa bilong ol long yu, taim yu ino laik.

Wanem samting em i seksol konsent?

GIVIM TOK ORAIT



Em i min olsem yu wokim sois taim nogat wanpela man/meri i fosim yu o giamanim yu, na taim yu ino bin spak long bia or spak brus.

STRONGPELA LAIK



Long taim bilong koap, yu mas wanbel long wokim wanem kain samting yu gat laik long wokim, na ino samting we yu tingim yu mas mekim long hamamasim narapela o samting ol i laikim long en.

TOK STRET



Sapos yu tok orait long wanpela samting (olsem sapos yu wanbel long go long rum bilong slip) ino min olsem yu wanbel lo wokim ol narapela samting (olsem koap). Na tu sapos wanpela i wanbel long putim gumi, na bihain long taim bilong koap ol i senisim tingting na ino putim, dispela em ino orait.

SENISIM TINGTING



Yu ken senisim tingting bilong yu enitaim. Yu ken senisim bipo o taim yutupela i koap i stap. Sapos dispela ino festaim bilong yu long koap o yu as nating pinis na i stap long bet, em i orait long yu senisim tingting.

INO OLGETA TAIM



Sapos yu givim tok orait bilong yu long mekim wanpela samting long dispela taim, ino min olsem yu givim tok orait long mekim dispela pasin olgeta taim.

MAUS PAS EM INO TOK ORAIT



Planti manmeri i painim hat long toktok long taim bilong poret. Sapos yu no toktok, em ino min olsem yu tok orait.

2

Toktok long husait yu trastim

Toktok wantaim wanpela husait yu trastim, olsem poro o wanpela femili memba o wanpela kaunsil sevis. Dispela em i gutpela long halivim yu long stretim tingting long wanem samting bai yu inap mekim nau.

Sapos yu ino laik long ripotim dispela asua, i gat planti hait hap we yu ken kisim fri halivim na sapot. Olgeta toktok bai stap namel long yu na ol tasol.

1800RESPECT

Em i wanpela hap we yu ken painim halivim na sapot long fon. Ol wok lain we i gat save long ol hevi bilong seksol asalt na femili vailans long kisim halivim na sapot. Yu ken painim ol tu long intanet long www.1800respect.org.au. 1800 737 732 (yu ken ringim ol long dei o nait). www.1800respect.org.au

Queensland Seksol Asalt Helpline

Ol i gat telefon sapot long seksol asalt sapos yu kisim bagarap long dispela rot, o yu laik halivim wanpela husait i bin bungim birua long dispela rot.

Ringim 1800 010 120 | www.dvconnect.org
Dispela ofis i op long 7.30 long mornin i go long 11.30 long nait long olgeta dei bilong wik.

Lesbian (Meri i gat laik long narapela meri),

Gay (Man i gat laik long narapela man),

Transgender (Man i senism bodi i go kamap meri, o meri i senism bodi i go kamap man)

Bisexual (Man i gat laik long man na meri tu, o meri i gat laik long meri na man tu)


Intersex (ol lain manmeri husait mama i karim ol wantaim difren bodi)

QLife

Wanpela hap we igat fon na intanet bilong givim halivim long olgeta lain bilong olgeta krismas.

Ringim 1800 184 527

Dispela ofis i op long 3pm i go inap 12 kilok nait lo olgeta dei bilong wik.



3

Kisim sapot

I gat ol kainkain sevis we i ken givim halivim long husait i laikim.

Dispela sevis em bilong olgeta, ol sumatin i kam long narapela kantri na ol visita tu i ken kisim halivim na sapot long dispela ol sevis.

Sapot bilong hausik

Yu ken kisim fri halivim long wanpela imegensi dipatmen long eni pablik hausik, sapos yu bungim dispela birua bilong seksol vailans.

Queensland Health Seksol Asalt Sevis em i fri long olgeta taim bilong dei (yu ino nidim Medicare kad).

Dispela sevis i gat fri toksave, marasin na sek bilong husait i bin bungim dispela birua bilong seksol asalt.

Ol i ken halivim yu tu long sekim yu long sik olsem STI (sik bilong koap), o wei bilong halivim yu long no ken kisim bel.

Evidens bilong hausik i ken halivim yu long soim pruf long wanem samting i kamap long yu.

Insait long 24pela aua long taim dispela seksol asalt i bin kamap, em i rait taim bilong sekim bodi bilong yu.

Dispela wok painim aut iken kamap long bodi bilong yu, insait long (7) sevenpela dei bihain tasol long taim yu bin bungim dispela birua. Em dispela wok painim aut em i bikpela samting stret, bilong soim olsem evidens insait long haus kot, sapos yu laik kisim dispela hevi i go long kot.

RINGIM DOKTA BILONG YU O RINGIM 13 HEALTH (13 43 25 84) LONG HARIM TOKSAVE NA SEVIS KLOSTU LONG YU.

Ligol Sapot

I gat fri ligol sevis we ol i ken givim yu tingting long wanem samting yu ken wokim, sapos yu laik kisim i go long han bilong lo.

Dispela ol gutpela tok em i ken karamapim wanem hap yu stap long en, skul na ples bilong wok na tu bilong givim ripot bilong yu i go long ol polis.

Ananit em i ol narapela fri, na gutpela ligol sevis

Ligol Sapot Bilong Ol Meri

Komuniti ligol haus we ol i save givim fri skul na tok bilong halivim ol meri.

1800 957 957 | <https://wlsq.org.au>

Ligol Halivim

Ol i save givim fri skul na tok na ol i ken sapotim yu long taim bilong kot.

1300 651 188 | www.legalaid.qld.gov.au

Long kisim sapot long ol viktim sevis

Viktim Sevis long Queensland

Sapos yu wanpela viktim bilong wanpela birua, yu bai i gat rot bilong kisim planti fri sevis we QLD Viktim Sevis i givim long en. Narapela halivim, ol i ken givim skul bilong halivim yu, na halivim yu long sait bilong moni tu.

Ringim 1300 546 587 (9am to 5pm).

Ripot igo long polis

Seksol asalt em i brukim lo. Sapos yu wanpela viktim bilong wanpela birua, em dispela bai i no ken wokim wanpela samting long visa o wok bilong yu.

Polis hia long Australia bai i mekim wok painim aut long ripot yu givim long en, long halivim yu na ol narapela long stap seif.

Yu ken mekim wanpela ripot i go long polis long ol dispela rot:

- Ringim tripela zero (000)
- Go ripot long wanpela polis stesen
- Ripotim dispela hevi long Crime Stoppers long 1800 333 000 sapos yu no laik bai ol i save long nem bilong yu.

Ol sapot sevis tu i ken halivim yu long mekim ripot i go long Polis.